

Illuutunik najugaqarfissatut attartortitsisarneq pillugu Namminersornerullutik Oqartussat nalunaarutaat nr. 12, 23. april 2008-imeersoq

Inissianik attartortitsisarneq pillugu Inatsisartut peqqussutaanni nr. 2-mi, 12. maj 2005-imeersumi Inatsisartut peqqussutaatigut nr. 18, 12. november 2001-imeersukkut, Inatsisartut peqqussutaatigut nr. 14-ikkut, 20. november 2006-imeersukkut allannguuteqartinneqartumi § 4, imm. 4, § 7, imm. 3, § 13, imm. 2, § 25, imm. 3, § 28, imm. 5, § 30, imm. 8, § 32, imm. 6, § 41, imm. 4, § 44, imm. 6, § 57, imm. 2, § 58, imm. 8, § 59, imm. 8, § 76, imm. 3, § 77, imm. 5 kiisalu § 81, imm 6, naapertorlugit aalajangersarneqarpoq:

Kapitali 1 *Atuuffissaa*

§ 1. Nalunaarut Namminersornerullutik Oqartussat kommunillu inissiaataanni attartortittakkani attartortitsinermut atuuttuuvoq, tassunga ilaallutik illunik illunilu ininik attartukkanik allanut attartortitsisarneq.

Imm. 2. Aammattaq kapitali 8 inissianut attartortittakkanut namminerisamik pigineqartunut atuuppoq.

Imm. 3. Sulisitsisup piffissamilu sivikitsumi atorfeqartussap akornanni allamik isumaqatigiissu-siortoqarsimappat kapitali 2-mi maleruagassat atuutissanngillat.

Kapitali 2 *Inissiiigallartarneq*

§ 2. Piffissami sivikitsumi atorfeqartinneqartut, ukiuni aalajangersimasuni atorfeqartinneqartut paarlatsillu atorfinitsinneqarnerminnut atasumik inissiamik inissiiviugallartussamik atugassinneqarsinnaapput. Inissiaq inissiiviugallartooq taamaallaat inissiiviugallartutut, aammalu taamaallaat inissinneqartup taassumalu sulisitsisuata akornanni allakkatigut isumaqatigiissusioreernikkut atugassanngortinneqassaaq.

§ 3. Inissinneqartoq inissiamut inissiiviugallartumut atasumik ingerlatsinermut aningaasartuutitut matu-sissutissanik akiliuteqartinneqartassaaq.

Imm. 2. Ingerlatsinermut akiliut inissiap inissiiviugallartup angissusaa, taamaattorli annerpaamik 180 kvm-iususaaq aammalu ukiumut kvm-imut 580 koruuniususaaq tunngavigalugu naatsorsorneqassaaq. Ingerlatsinermut akiliummut innaallagissamik, kiassarnermik imermillu atuinerit naammaattunik nalilerlugit ilaatinneqarput.

§ 4. Inissiaq inissiiviugallartooq pequsersugappat inissinneqartoq qaammammoortumik pequtinut akiliuteqartinneqartassaaq. Pequtinut akiliut inissiap angissusaa naapertorlugi qaammammut imatut annertussusiligaavoq:

- 1) Ineeqqanut inissianullu 1-mik initalinnut 100 koruunit.
- 2) Inissianut 2-nik initalinnut 150 koruunit.
- 3) Inissianut 3-nik initalinnut 200 koruunit.
- 4) Inissianut 4-nik initalinnut 250 koruunit.
- 5) Inissianut 5-nik initalinnut anginerusunulluunniit 300 koruunit.

§ 5. Ingerlatsinermut akiliut pequtinullu akiliut qaammammik siumoortumik akilersinneqartassapput, aammalu inissinneqartup allakkatigut akuersineratigut akissarsianit ilanngaassinikkut akilersinneqartassallutik. Innaallagissamik, imermik kiassarnermillu atuineq § 3, imm. 2-p immikkoortua tulleg naapertorlugi naammaginar-tumik oqaatigineqarsinnaasumit annertuneruppat, akiligassiinikkut akiliisitsisoqarsinnaavoq.

§ 6. Ingerlatsinermut akiliut aamma pequtinut akiliut sulisunut atorfeqavissunut, isumaqatigiis-sutit malillugit sulisunut inissiamik tunineqarnis-samut pisinnaatitaaffeqartunut akilersinneqartas-sanngillat, imatut pisoqartillugu:

- 1) Sulisunut inissiamik tunineqarnissap tungaanut inissikkallarneqartunut.
- 2) Piffissap atorfeqarfiusup naanerani piffissami sivikitsumi inissikkallarneqartunut.

§ 7. Inissiaq inissiiviugallartooq iserterfigineqar-nermini pitsaasumik illersorsinnaasumillu pitsaas-suseqarnersoq sulisitsisup misissussavaa.

Imm. 2. Iserternermi sulisitsisup inissinneqarallar-tullu ataatsimoorlutik iserternermut nalunaarusiaq suliarissavaat, tassungalu inissiami inissiiviugal-lartumi inissiap pitsaassusaa aamma amigaataa-sinnaasut allanneqassapput. Sulisitsisup iserter-nermi nalunaarusiap illuatungeriinnit atsiorne-qarnissaa isumagissavaa.

§ 8. Inissikkallarneqartoq pisussaavoq atorfeqar-nerup naanerani inissiaq inissiiviugallartooq qimassallugu, taamaattorli imm. 2 takuuk.
Imm. 2. Atorfeqarallarnerpup naaneraniit nutaamik atorfeqarallarnissap aallartinnerata tungaanut piffissaq sivilunerpaamik qaammat ataasiuppat, nutaamik atorfininnermi atugassarititaasut annersaat atorfimmi qimataani atugassarititaa-sunut assinguppata inissinneqarallartup inissiamik inissinneqarallartuq tiguinninnarnis-saa sulisitsisup anguniassavaa. Inissinneqarallar-toq atorfiit marluk taakku akornanni piffissamut

ingerlatsinermut § 3 imm. 1 naapertorlugu akiliuteqartinneqassaaq.

§ 9. Inissinneqarallartup inissiaq inissinneqarallarfini qaammammik ataatsimik sioqqutsilluni qaammatip naaneranut atuutilersussamik taamaatinniarlugu sulisitsisumut nalunaarsinnaavoq. Attartorunnaarnissaq allakkatigut nalunaarutigineqassaaq.
Imm. 2. Atorfeqarnerup naannginnerani sulisitsisup inissiamut inissiiviugallartussamut assingusumut innersuussummik takutitsinermigut, inissinneqarallartup inissiamik inissiiviugallartumik qimatsinissaa piumasarisinnaavaa. Tamanna pillugu nalunaarut qaammammik ataatsimik sioqqutsilluni qaammatip naaneranut atuutilersussanngorlugu inissinneqarallartumut allakkatigut tunniunneqassaaq.

§ 10. Inissinneqarallartup inissiamik qimatsinermi inissiaq inissiiviugallartoq iserternermisut pitsaasuseqartillugu tunniutissavaa, tassanili nungullarnerit pisoqalinerillu nalinginnaasut pineqanngillat.
Imm. 2. Inissiap qimanneqarnerani sulisitsisup inissinneqarallartullu ataatsimoorlutik inissiap qimanneranut nalunaarusiaq suliarissavaat, tassungalugu inissiap inissiiviugallartup pitsaassusaa aamma amigaataasinnaasut allanneqassapput. Sulisitsisup inissiap qimanneranut nalunaarusiap illuatu-ngerinuit atsiorneqarnissaa isumagissavaa.
Imm. 3. Inissinneqarallartoq piffissami attartorfigisamini inissinneqarallartup inissiami inissiiviugallartumi sumiginnaaneranut atasumik ajoqusikkanut taarsiisussaatitaavoq.

Kapitali 3

Utaqqisut allattorsimaffii innersuussisarnerlu

§ 11. Inissarsiorlut utaqqisut allattorsimaffiinut ukununnga ilanngunneqarsinnaapput:

- 1) Utaqqisut allattorsimaffiat nalinginnaasoq.
- 2) Nammineq kissaatigisamik nuunnissamut utaqqisut allattorsimaffiat.
- 3) Sulisut, Namminersornerullutik Oqartussat imaluunniit kommunip inissiaataanut innersuunneqarsinnaatitaallutik atorfeqartinneqartut nammineq kissaatigisamik nuunnissamut utaqqisut allattorsimaffiat.

Imm. 2. Utaqqisut allattorsimaffianni inissisimaffik allanut tunniunneqarsinnaanngilaq, taamaattorli § 14 takuuk.

Imm. 3. Attartortitsisoq illoqarfikkaartumik, nunaqarfikkaartumik imaluunniit allami sumiiffikkaartumik utaqqisunut allattorsimaffeqassaaq. Illoqarfimmi, nunaqarfimmi imaluunniit allami sumiiffimmi immikkut Namminersornerullutik Oqartussat kommunillu inissiaataannut utaqqisut ataatsimoortillugit allattorsimaffiortoqarsinnaavoq.

§ 12. Inuit 15-ileereersimasut kikkulluunniit utaqqisut allattorsimaffiannut nalinginnaasumut allatsissinnaapput.

Imm. 2. Inissarsiorlut qinnuteqarneratigut utaqqisut allattorsimaffianni inissisimaffia pillugu attartortitsisup ilisimatissinnaavaa.

§ 13. Inissarsiorlut utaqqisut allattorsimaffiannut ilanngunneqarneranut atatillugu utaqqisut allattorsimaffianik aqutsinermut aningaasartuuterpianik matusissutissanik 100 koruunit angullugit attartortitsisoq akiliuteqartitsisinnaavoq. Inissarsiorlut utaqqisut allattorsimaffianniinnerminut ukiumoortumik uppernarsaasarneranut atatillugu utaqqisut allattorsimaffianik aqutsinermut aningaasartuuterpianik matusissutissanik 100 koruunit tikillugit akiliisinneqartassaaq.

Imm. 2. Akitsuutip akilernerneqannginnera utaqqisut allattorsimaffianniigunnaarnermik nassataqassaaq. Taamaattorli attartortitsisup utaqqisut allattorsimaffianni atermik peersinnginnermini pineqartuq naleqquttumik piffissaqartillugu allakkatigut akitsuummik akileeqqusinnaavaa.

§ 14. Inissarsiorlut toqunerani inissarsiorlut utaqqisut allattorsimaffianni nalinginnaasumi aammalu nammineq kissaatigisamik nuunnissamut utaqqisut allattorsimaffianni inissisimaffia toqusup aappaanut suli inuusumut tunniunneqassaaq.

Imm. 2. Inissarsiorlut paaqqutarisarialinnut angerlarsimaffimmut imaluunniit sanngiillisimasunut allanut angerlarsimaffimmut nuuppat, utaqqisut allattorsimaffianni nalinginnaasumi aammalu nammineq kissaatigisamik nuunnissamut utaqqisut allattorsimaffianni inissisimaffia inissarsiorlut aappaanut tunniunneqassaaq.

Imm. 3. Aappaasumut imm. 1-imi aamma 2-mi taaneqartumut aappaasutut nalunaarsorsimasoq kiisalu inuk sivikinnerpaamik ukiuni 2-ni inissarsiorlutumik najugaqateqarsimasutut inuit allattorsimaffianni nalunaarsorsimasoq sanilliunneqarput.

§ 15. Attartortitsisoq inissianik inoqanngitsunik inissarsiorlut, § 11 naapertorlugu utaqqisut allattorsimaffiannut ilaasunut innersuussisassaaq, periaatsit uku malillugit:

- 1) Inissarsiorlut attartortitsisup inissiat neqeroortugisaasa ilaannik attartornissamik neqeroorteqarluni attartortitsisumut saaffiginninneratigut.
- 2) Attartortitsisup inissarsiorlutumut inissiamik attartortitsinissamik allakkatigut neqeroorteqarneratigut.

Imm. 2. Inissiaq inoqanngitsuoq inissarsiorlutumut piffissami sivilunerusumi utaqqisut allattorsimaffianniissimasumut neqeroortugit-

neqassaaq, tak. imm. 1.

§ 16. Attartortitsisoq attartortitsinissamik itigartitsisinnaavoq:

1) Inissarsiortoq siornatigut attartornermini attartortitsisumut akiitsoqarpat.

2) Inissiami najugaqartussat inissiami inimut ataatsimut marluk sinnerlugit amerlassuseqarpata.

Imm. 2. Attartortitsisoq imm. 1, nr. 1 naaportorlugu itigartitsisinnaangilaq, attartortoq atorfeqarnerminut atatillugu sulisunut inissiamik innersuunneqarnissamut pisinnaatitaaffeqarpat.

Kapitali 4

Najugaqarfii

§ 17. Attartortitsisoq ilaqtariinnut arlalinnut inissiat najugaqarfinnut katitigaanissaannut kiisalu aguarneqarnissaannut imaluunniit najugaqarfiit kattunnissaannut aalajangiisassaaq.

Imm. 2. Inissiaruarni attartortittakkani inissiat tamarmik najugaqarfimmut ataatsimut ilaatinneqartassapput.

Imm. 3. Najugaqarfik ataaseq aningaasatigut ajornartorsiorpat, attartortitsisoq ingerlatsinermut tapiissutinik najugaqarfimmut tapiissuteqartassaaq.

Imm. 4. Najugaqarfinnik aatsaat kattussisoqarsinnaavoq, najugaqarfiit akiliisinnaassuseqarpata ingerlatsinikkullu sinneqartooruteqarfiuppata.

Imm. 5. Najugaqarfinni kattunneqartuni ingerlatsinermut aningaasartuutissat najugaqarfiit maannamut ingerlasimanerat eqqarsaatigalugu kisitsisit ataasiakkaanut naleqqiussat malillugit aalajangersarneqassapput, tassanili kisitsisit ataasiakkaanut naleqqiussat sivilunerpaamik ukiut 10-it ingerlanerini nalimmassarneqassapput.

Kapitali 5

Najugaqarfinni ataatsimiinnerit pilersitsiviusut aamma najugaqarfinni siulersuisut

Najugaqarfinni ataatsimiinnerit pilersitsiviusut

§ 18. Attartortitsisoq najugaqarfimmik nutaamik pilersitsinermiit kingusinnerpaamik qaammatit 6-it qaangiunnerini najugaqarfimmi ataatsimiinnermut pilersitsiviusussamut aggersaassaaq.

Imm. 2. Najugaqarfimmi attartortut najugaqarfimmi ataatsimiinnerup pilersitsiviusussap pinissaa namminneerlutik suliniuteqanermikkut suliniutigisinnaavaat. Suliniuteqartut attartortitsisumut saaffiginissapput, taassumalu najugaqarfimmi attartortut tamarmik aggersarneqarnissaat isumagissavaa.

Imm. 3. Imm. 1 aamma 2 naaportorlugit ataatsimiinnissamut ataatsimiigiqqusineq tamanit takuneqarsinnaasumik allagarsiinikkut, najukkami

aviisitigut allagarsiinikkut imaluunniit najugaqarfimmi attartortut tamarmik allaffigineqarnerisigut sivikinnerpaamik sapaatit akunnerinik 4-nik sioqutsisumik nalunaaruteqarnikkut pissaaq.

Imm. 4. Najugaqarfimmi ataatsimiinnermut pilersitsiviusumut attartortitsisoq, najugaqarfimmi attartortut, taakku aappaat aammalu inuit sivikinnerpaamik ukiuni 2-ni attartortumik najugaqateqarsimasutut inuit allattorsimaffianni nalunaarsorsimasut peqataasinnaapput.

Najugaqarfimmi siulersuisut sulinerat

§ 19. Najugaqarfimmi attartortut najugaqarfimmi ataatsimiinnermi pilersitsiviusumi najugaqarfimmi siulersuisussanik taasisinnaapput, tak. § 21.

Imm. 2. Najugaqarfimmi siulersuisussanik qinersisoqarsimangippat, imaluunniit najugaqarfimmi siulersuisussanik nutaanik qinersisoqarani najugaqarfimmi siulersuisut sulinerminnik unitsitsimappata, attartortitsisup suliassat, najugaqarfimmi siulersuisunut suliassangortinneqarsimasut isumagissavai.

Imm. 3. Najugaqarfimmi ataatsimiinnermi pilersitsiviusumi najugaqarfimmi siulersuisussanik qinersisoqarsimangippat, ataatsimiinnerup kingorna siusinnerpaamik qaammatit 6-it qaangiunnerini najugaqarfimmi ataatsimiinnermut pilersitsiviusumut nutaamut aggersaasoqassaaq.

§ 20. Najugaqarfimmi siulersuisussanik qinersineq ataatsimeeqataasut akornanni amerlanerusuteqartut aalajangiinerat malillugu akuersissutigineqartassaaq.

Imm. 2. Attartuq ataaseq taasinermik ataatsimik naleqarpoq, inoqutiinni inuit amerlassusaat apeqquataatinnagit. Attartornermut isumaqatigiisut malillugu attartortoq taasisinnaatitaavoq.

Attartortoq piginnaatitsissuteqarnermigut ataatsimiigartitsisinnaavoq taasititsisinnaallunilu.

Imm. 3. Attartortut ataatsimiinnermi peqataasut namminneerlutik ataatsimiinnermik aqutsisusamik taasisapput.

§ 21. Najugaqarfinni inissianit 500-t inorlugit ilaasortaaffigineqartuni najugaqarfinni siulersuisut, ataatsimiinnermi qinigaasut ataatsimik siulittaasoqassapput 2-nillu siulersuisunut ilaasortaqaassallutik.

Imm. 2. Imm. 1 naaportorlugu najugaqarfinni ataatsimiinnermi aamma siulittaasumut sinniisissaq kiisalu siulersuisuni ilaasortanut sinniisissat qinerneqassapput.

Imm. 3. Najugaqarfinni inissianit 500-nit amerlanerusunilluunniit ilaasortaqaartuni

siulersuisunut ilaasortat 2-nik ilallugit, taakku-nunngalu sinniisissanik 2-nik qinersisoqarnissaa aalajangerneqarsinnaavoq.

Imm. 4. Siulittaasoq, siulersuisuni ilaasortat sinneri kiisalu sinniisissat ukiumi 1-mi atuuttussanngorlugit qinerneqassapput. Qinigaaqqittoqarsinnaavoq.

Imm. 5. Siulittaasoq imaluunniit siulersuisuni ilaasortaq ataaseq ikerinaannakkut tunuarpat, sinniisissaq najugaqarfimmi ataatsimiinnerup tulliup tungaanut atuuttussanngorlugu ivertinneqassaaq.

§ 22. Najugaqarfimmi attartortut namminersorsinnaatitaasut, taakku aappaat imaluunniit inuk namminersorsinnaatitaasoq sivikinnerpaamik ukiuni 2-ni attartortumik najugaqateqarsimasutut inuit allattorsimaffianni nalunaarsorsimasoq najugaqarfimmi siulersuisunut qinigaasinnaapput.

Imm. 2. Najugaqarfimmi siulersuisut katitigaaneratt pillugu nalunaarut tamanit takuneqarsinnaasumik allagarsiinikkut, najukkami aviisitigut allagarsiinikkut imaluunniit najugaqarfimmi attartortut tamarmik allaffiginerisigut saqqummiunneqassaaq. Attartortitsisoq immikkut ittumik allakkatigut ilisimatinneqassaaq.

§ 23. Ukiut tamaasa najugaqarfimmi najugaqartut ataasiarlutik ataatsimiitinneqartassapput.

Najugaqarfimmi ataatsimiinneq ukiup naatsorsuorsiorfiusup aallartinnissaanut kingusinnerpaamik qaammatit 3-it sioqqullugit pisassaaq.

Imm. 2. Najugaqarfimmi siulersuisut siusinnerpaamik sapaatit akunnerinik 4-nik sioqqutsilluni tamanit takuneqarsinnaasumik allagarsiinikkut, najukkami aviisitigut allagarsiinikkut imaluunniit attartortut tamaasa allaffiginerisigut najugaqarfimmi ataatsimiinnissamut aggersaassapput.

§ 24. Najugaqarfimmi ataatsimiinnermi oqaluuserisassat imarissavaat:

- 1) Najugaqarfimmi siulersuisut ukiup siulianut nalunaarutaannik saqqummiussineq.
- 2) Siulersuisut aningaasanik § 30-mi taaneqartunik atuinnermut nalunaarutaat.
- 3) Ukiumoortumik nalunaarutit akuerineqartup kingulliup saqqummiunneqarnera.
- 4) Najugaqarfimmi ukiumut naatsorsuorsiorfiusumut tullermut missingersuutaanik saqqummiussineq.
- 5) Najugaqarfimmi siulersuisut siulittaasussaannik taassumalu sinniisussaannik qinigassanngortittunik qinersineq.
- 6) Najugaqarfimmi siulersuisuni ilaasortassanik taakkulu sinniisissaannik qinigassanngortissimasunik qinersineq.
- 7) Siunnersuutit takkuttut.
- 8) Tamalaat.

§ 25. Najugaqarfimmi immikkut ittumik ataatsimiinneq pissaaq:

- 1) Najugaqarfimmi siulersuisut tamatumunnga tunngavissaqarpata.
- 2) Najugaqarfimmi attartortut ikinnerpaamik arfineq pingajorarterutaasa oqaluuserisassamik suliaqartoqarnissaa kissaatigippassuk.
- 3) Attartortitsisoq tamanna pillugu qinnuteqarpat.

§ 26. Ukiumut nalunaarut akuerisaq kingulleq ukiumullu naatsorsuiffiusumut tulliuttumut missingersuutit najugaqarfimmi ataatsimiinnissaq kingusinnerpaamik sapaatit akunneranik sioqqullugu najugaqarfimmi attartortunit tamanit takuneqarsinnaassapput.

§ 27. Najugaqarfimmi attartortut, taakku aappaat imaluunniit inuk sivikinnerpaamik ukiuni 2-ni attartortumik najugaqateqarsimasutut inuit allattorsimaffianni nalunaarsorsimasoq najugaqarfimmi ataatsimiinnermut aamma najugaqarfimmi immikkut ittumik ataatsimiinnermut peqataasinnaapput.

Imm. 2. Kikkulluunniit imm. 1 naapertorlugu najugaqarfimmi ataatsimiinnermut peqataasinaasut pisinnaatitaapput, siunnersuutit najugaqarfimmi ataatsimiinnermi suliarineqartussanik saqqummiussissallutik, tak. § 28, imm. 1.

Imm. 3. Attartugaq ataaseq taasinnermik ataatsimik naleqarpoq, inoqutigiinni inuit amerlassusaat apeqqutaatinnagit. Attartornermut isumaqatigiisut malillugu attartortoq taasisinnaatitaavoq.

Attartortoq piginnaatitsissuteqarnermigut ataatsimiigartitsisinnaavoq taasititsisinnaallunilu.
Imm. 4. Siunnersuummik saqqummiunneqartumik akuersineq ataatsimeeqataasut akornanni amerlanerussuteqartoqarneratigut pisassaaq.

§ 28. Siunnersuutit najugaqarfimmi ataatsimiinnermi imaluunniit najugaqarfimmi immikkut ittumik suliarineqartussatut kissaateqarfiusut ataatsimiinnissaq kingusinnerpaamik sapaatit akunnerinik 2-nik sioqqullugu najugaqarfimmi siulersuisunit tiguneqareersimassapput.

Imm. 2. Siunnersuutit najugaqarfimmi ataatsimiinnermi imaluunniit najugaqarfimmi immikkut ittumik suliarineqartussatut kissaateqarfiusut ataatsimiinnissaq kingusinnerpaamik sapaatit akunnerannik ataatsimik sioqqullugu najugaqarfimmi attartortunit tamanit takuneqarsinnaassapput.

§ 29. Inatsisit malillugit najugaqarfimmi ataatsimiinnissamut aggersaasoqarsimatillugu najugaqarfimmi siulersuisut kisimik takkussimappata, attartortitsisoq najugaqarfimmi siulersuisunut

isumaqatiginninniareerluni najugaqarfimmi immikkut ittumik ataatsimiinnissamut aggersaasinnaavoq, najugaqarfimmi siulersuisut atorunnaarnissaat pillugu siunnersuut kisiat oqaluuserisassani allallugu.

§ 30. Attartortitsisoq najugaqarfimmi najugaqarfimmut siulersuisoqartuni ukiumut kvm-imut 3 kr.-nit angullugit, najugaqarfimmi siulersuisut aningaasartuutaannut imm. 2-mi taaneqartunut matussutissanik missingersuusiussaaq.

Imm. 2. Najugaqarfiit najugaqarfimmi ataatsimiinnermut, najugaqarfimmi siulersuisut pikkorissarnerinut aamma najugaqarfimmi attartortut ataatsimoornissaannik aaqqissuussinernut aningaasartuutit naammaattunik annertussusillit akilerneqarnissaat pillugu aalajangersinnaapput.

Kapitali 6

Sillimmatissanik immikkoortitsisarneq, aserfallatsaaliuineq ingerlatsinerlu

§ 31. Najugaqarfimmi imaluunniit ingerlatsinermut aserfallatsaaliuinissamullu immikkoortortani attartortitsisup ukiut tamaasa illuutit aserfallatsaalineqarnerminni pitsaassusaat misissortassavai, inissiat ullutsinnut naleqquttumik pitsaassuseqalersinniarlugit aserfallatsaaliuinissamut nutarterinissamullu pilersaarummut atugassamik.

Imm. 2. Imm. 1 naapertorlugu aserfallatsaaliuinissamut nutarterinissamullu pilersaarussiaq minnerpaamik ukiunut tulliuttunut 10-nut tunngasuussaaq. Aserfallatsaaliuinissamut pilersaarummi piffissap qanorluunniit ilinerani illup pineqartup ilaanik atortulersuutissaanilluunniit piseqqinnermut akit atuuttut tunngavigineqartassapput.

Imm. 3. Attartortitsisup aserfallatsaaliuinissamut pilersaarummut ilassutitut sillimmatissat immikkoortinneqartut nikittarnerannut malitassiaq malillugu ukiumut agguakkamik akiliisinnaassutsimut missingersuusiussaaq.

Imm. 4. Attartortitsisup agguaqatigiissillugu ukiut 6-ikkaarlugit attartukkap aserfallatsaaliorneqarneranut pilersaarusiorniarlugu aammalu inissiap iluani aserfallatsaaliuinissamut sillimmatitut immikkoortinneqartussat aalajangersarniarlugit aserfallatsaaliorneqarnermini pitsaassusiata nalunaarsorneqarnissaa siunertaralugu attartugaq misissortassavaa.

§ 32. Najugaqarfik aamma ingerlatsinermut aserfallatsaaliuinermullu immikkoortortaarfik ukiumoortumik aningaasanik naammaattunik amerlasusilikkanik akiliisitsisassaaq sillimmatissatullu immikkoortitsisassalluni, ukununga atugassanik: 1) Aserfallatsaaliuinissamut nutarterinissamullu pilersaarut malillugu teknikkikkut atortulersuutinik

nutarterineq ikkussuinerlu, inissiat silataanni iluini lu aserfallatsaaliugassat iluarsagassallu pilersaarutaasut piffissamullu agguakkat, kiisalu inissiat qimanneqartarnerat malillugu tulleriaarluni iluarsaassisarneq.

2) Ineqarnermut akiliutinit annaasat aamma inissiat qimanneqartarnerannut atatillugu annaasat.

3) Aningaasat aserortikkanik iluarsaassisarnermut atugassat naleqquttumik annertussusillit.

Imm. 2. Aningaasat imm. 1 naapertorlugu akilerinneqartut sillimmatissatullu immikkoortinneqartut atorfissaannut immikkoortiterlugit najugaqarfiup ingerlatsinermut aserfallatsaaliuinermullu naatsorsuutaanni allassimassapput.

§ 33. Najugaqarfiup aamma ingerlatsinermut aserfallatsaaliuinermullu immikkoortortap aningaasat sillimmatitut immikkoortitaat immikkoortinneqarnerminni siunertamit allaanerusumut atorneqassanngillat. Tamannali siunertarineqartoq taamaatinneqarsimappat atuutissanngilaq.

§ 34. Inissiap inoqannginnera ataavartuusimappat, tassalu qaammatit 2-it sinnerlugit inoqarsimanngippat, inissiamut piginnittumut aningaasaliusutinit iluanaarutissanik naatsorsuisoqassanngilaq, taamatullu najugaqarfimmi ingerlatsinermut aningaasartuutit naleqqussarneqassapput, taamaaliluni attartortitsinermut akiliuteqartoqartannginnera sillimaffiginiarneqassalluni.

Kapitali 7

Inissiap annertussusaanik naatsorsuisarneq

§ 35. Ineqarnermut akiliutissap aamma ineqarnermut akiliummik qaffaanissap aalajangersarneqarnissaanut atugassatut inissiap annertussusaa §§ 36 aamma 37 naapertorlugit naatsorsorneqassaaq.

§ 36. Ilaqutariinnut arlalinnut inissiani, inissiami init tamarmik inissiap annertussusaanut ilaatinneqassapput. Pequusiviit quilluunniit, inissiamit avinngarusimasumut inissitaasut ilanngunneqassanngillat.

Imm. 2. Ilaqutariinnut arlalinnut inissiani inissiap ataatsip naatsorsornerani silataani iikkamiit imaluunniit qaliani silataani iikkamiit, tak. § 37, imm. 3, aamma inissiat aggornerisa qeqqanniit uuttuisoqassaaq. Ilaqutariinnut arlalinnut inissiani illup isua inissiat aggorneranni ikkatut affartut naatsorsuinerlut ilanngunneqassaaq.

Imm. 3. Inissiami majuartarfiit annertussutsimik uuttortaanermi inini quleriinni atorneqarfigisaminni ilanngunneqassapput.

§ 37. Ilaqutariinnut ataatsinut illuni illunilu affarleriinni inissiap annertussusaa imm. 2-5 malillugit naatsorsorneqassaaq.

Imm. 2. Inissiap quleriivini inissap annertussusaata uuttorneyani, illup silataani qisuup silarliup tungaaniit takisusaanut silissusaanullu amerlisitsilluni naatsorsuinikkut uuttuisoqassaaq. Qisunni qalliutaasuni 2-ni qisuup alliup silataaniit uuttuisoqassaaq. Ukiuunerani naatsiiviit inissiap annertussusaanut tamakkiisumut ilaatinneqassanngilaq.

Imm. 3. Qaliaq inigisassatut iluarsaanneqarsimappat inissiap annertussusaanut ilanngullugu naatsorsorneqassaaq. Qaliani inigisassap uuttortarnerani takisusaanut silissusaanullu amerlisitsilluni naatsorsuisoqassaaq. Qaliani takissuseq inissiap quleriivini nalinginnaasuni uuttuisarnertut uuttorneyassaaq, silissuserlu silami qaliat qalliutaasa qaliap naqqaniit 1,5 meterinik portussuseqartut akornanni uuttorneyassalluni. Ilassutit, soorlu aniingarnit, iikkat inimut killiliissutaasut silataanniit uuttorneyassapput.

Imm. 4. Naqqup ataani inissiap annertussusaata uuttorneyani naqqup ataata silataani iikkaniit takisusaanut silissusaanullu amerlisitsilluni naatsorsuinikkut uuttuisoqassaaq. Naqqup ataa tamakkerluni inissiat atorneyanngippat, inissiap annertussusaa iikkat, ininik inissiap uuttortarnerani ilannguneqartussanut killiliisut ilorliit qeqqanniit uuttuisoqassaaq. Init naqqi tamakkerlutik cementimik betonimilluunniit qallerneqanngippata, taakku uuttortaanermi ilannguneqassanngillat. Naqqup ataata quillu uuttortaanermut ilannguneqarnerani annertussutsip sisamararterutaa inissiap annertussusaata imm. 2 naapertorlugu uuttorneyanun ilannguneqassaaq.

Imm. 5. Inissiami majuartarfiit annertussutsimik uuttortaanermi inini quleriinni atorneyarfigisaminni ilannguneqassapput.

Kapitali 8

Kiassarnermut naatsorsuutit aamma imermut naatsorsuutit

§ 38. Kiassarnermut naatsorsuutit ilusilersorneqarnerini attartortut ataasiakkaat aningaasartuutaat kiassarnermut imermullu kissartumut tunngasut tamakkiisut takuneqarsinnaassapput.

Imm. 2. Attartortunut ataasiakkaanut kiassarnermut naatsorsuutini akiliigallarnikkut akiliutaasimasinnaasut akiligassarpianit amerlanerunerunersut ikinnerunersulluunniit ersarissumik allassimassaaq.

§ 39. Aningaasartuutininun tunngasut immikkoortiterneqassapput. Tassani aningaasartuutinit tamakkiisunit qanoq annertutigisut uuliamik pisinnermut uuliamillu assartuinnermut, innaallagialu atorlugu kiassaanermut aamma kiassaateqarfimmit kiassarnermik pilersorneqarnermut atorneyarsima-

nersut ersarissumik allassimassaaq.

Imm. 2. Aningaasartuutit allat, kissamik imaluunniit imermik kissartumik pilersuinnermut attuumasuteqartut aamma ilannguneqarsinnaapput, assersuutigalugu innaallagissamut, imermut, aserfalletsaaliuinnermut, sillimmatissanik illuartitsinnermut, nakkutilliinnermut allanullu aningaasartuutit.

§ 40. Attartortitsisup aalajangiinera naapertorlugu kiassaateqarfinnut, immikkoortortaqarfiinut imaluunniit najugaqarfinnut tamanut immikkut naleqquissisarlu aningaasartuutit attartortunut agguataarneqartassapput makku tunngavigalugit:

- 1) Inigisat ataasiakkaat inigisatut angissusiat.
- 2) Kiassaatit.
- 3) Kiaap agguataarneqarnissaanut uuttuutit, aalarnermut uuttuutit aamma elektroniskiusumik agguataarinnermut uuttuutit.
- 4) Kiammut nukinnut uuttuutit.
- 5) Nr. 1-4-mi periaatsit taaneqartut akuleriissinnerat.

§ 41. Attartortitsisup imermut aningaasartuutimi attartortumit akilerneqartarnissaat piumasarippagu, attartortuq imermut naatsorsuusiusaaq. Uuttuut pingarneq imaluunniit uuttuutit pingarnerit ataatsimoortut tamarmik immikkut imermut naatsorsuusiorfigineqassapput.

Imm. 2. Imermut uuttuummi nalunaarsorsimasapput:

- 1) Imermut aningaasartuutit attartortunut ataasiakkaanut qanoq agguarneqarnerisut.
- 2) Attartortut ataasiakkaat imermut aningaasartuutissaat naatsorsuinnermut uuttuutit immikkoortut imaluunniit inissiap annertussusaa tunngavigalugu naatsorsorneqarnerisut. Uuttuutit immikkoortut tunngavigalugit attartortup imermut aningaasartuutai taamaallaat naatsorsorneqarsinnaapput, pineqartup uuttuutaa tassungalu atortulersuutai attartortitsisumit siumoortumik akuerineqarsimappata.

Imm. 3. Imermut naatsorsuutini attartortup akiliigallarnermini akiliutai akiligassarpianit amerlanerunersut ikinnerunersulluunniit ersarissumik allassimassaaq.

§ 42. Attartortitsisup imermut naatsorsuutit kingusinnerpaamik 30. april sumiiffimmi attartortitsisumit taaneqartumi tamanut takuneqarsinnaasunngorlugit saqqummiutissavai.

Imm. 2. Imm. 1-imi aalajangersarneqartutut ulloq taanna nallertinnagu naatsorsuutit saqqummiunneqanngippata attartortitsisup akiliigallarnikkut akiliutit saniatigut akiligasseeqqinnissamik pisinnaatitaanini annaassavaa.

Imm. 3. Naatsorsuutit kingusinnerpaamik 30. juni

saqqummiunneqarsimangippata attartortoq pisinnaatitaavoq naatsorsuutit inaarutaasut naapertorlugit pissarsiassani tunniunneqarnissaasa tungaanut, Kalaallit Nunaanni aningaaserivip aningaaserivimmiittuutitut erniarititai qaffasinnerpaat malillugit ernialersortissallugit. Attartortup pissarsiassaanik ernialersuineq, attartortumut akiliutaasimasunik utertitsinissaq pillugu allakkatigut nalunaaruteqarluni nassiussereersimasussaagaluarnemit junip 15-aniit aallartissaq.

Imm. 4. Akiliuteqaqqinnissamik imaluunniit akiliutaasimasunik utertitsinissamik allakkatigut nalunaarut kingusinnerpaamik junip 15-ani attartortumut nassiutereersimassaaq. Attartortoq imm. 6 naapertorlugu akerliliisinnatitaasoq nalunaarummi paasisutissiissutigineqassaaq.

Imm. 5. Imm. 4 naapertorlugu nalunaarut kingusinnerpaamik junip 15-ani nassiunneqarsimangippat, attartortup akiliuteqaqqinnissaa piumasarineqarsinnaangilaq.

Imm. 6. Attartortup naatsorsuutitut akerliliissutaa attartortitsisumut allakkatigut saqqummiunneqassaaq attartortumiillu kingusinnerpaamik aggustip aallaqqaataani nassiunneqareersimassalluni. Attartortitsisup naatsorsuutit junip 30-anit kingusinnerusumik tunniussimappagit attartortumillu aggustip aallaqqaataani tiguneqarsimangippata, attartortoq akerliliissuteqarnissaminut imermut naatsorsuutit saqqummiunneqarneranniit qaammatinik marlunnik periarfissaqarpoq. Akerliliissumi paasisutissiissutigineqassaaq naatsorsuutit immikkoortut suut akuerineqarsinnaasimanginnersut.

§ 43. Attartortitsisoq § 42, imm. 4-imi piffissaliusap qaangiunnerani pisiortorfinnit avataaneersunit naatsorsuutigineqariinngitsunik akiliutinik imermut naatsorsuutitut naammassereersunut tunngassuteqartunik tigusaqarsimaguni, attartortitsisup qaqutigoortumik akiliutit ukiup tullianut imermut naatsorsuutitut nuussinnaavai. Attartortitsisup akiliutit nuunneqartut annertussusaa pillugu attartortut ilisimatissavai.

Imm. 2. Attartortut akornanni aningaasartuutit agguataarnerat kukkuneqarsimappat attartortup attartortut pineqartut allakkatigut nalunaarfialugit kukkuneq piaarnerpaamik aaqiivigissavaa, tak. imm. 3 aamma 4.

Imm. 3. Attartortoq akiliutaagallartunik akiliinikipallaarsimappat, siusinnerpaamik attartortup imm. 2 naapertorlugu nalunaarummik tigusaqarneranit qaammatip ataatsip kingorna ineqarnermut akiliummut siullermut ilassutitut akiliinissaq attartortitsisup piumasarisinnaavaa. Taamaattorli ilassutitut akiliutissaq qaammatini pingasuni imermut akiliutaagallartunit annertuneruppat, qaammatini pingasuni annertoqqatigiinnik qaammammut akiliinissamik

attartortoq pisinnaatitaavoq.

Imm. 4. Attartortoq imermut akiliutaagallartunik akiliivallaarsimappat, aningaasat akiliutaavallaarsimasut erngerlutik aningaasangorlugit attartortumut utertinneqassapput imaluunniit imm. 2 naapertorlugu nalunaaruteqareernerup kingorna ineqarnermut akiliummut siullermut ilanngaatigineqassallutik.

Kapitali 9

Pitsanngorsaannerit pissarsiassallu

§ 44. Attartortoq inissiami nammineq akilikaminik pitsanngorsaaniarluni attartortitsisumut akuersissummik piniarpat, attartortup suliassamut nassuiaat, suliassap teknikkimut taamatullu aningaasaqarnermut, atortussanut, pitsaassutsumut, qalipaatinik toqqaanermut suliassallu suliari- neqarnissaanut piffissamut pilersaarummut tungasortaanik nassuiaatitaqartoq nassiutissavaa.

Imm. 2. Pitsanngorsaannermi sananissamut akuersissut akuersissulluunniit alla pisariaqartinneqarpat, attartortitsisumut akuersissummik piniartoqassaaq. Aatsaat akuersissut tiguneqareerpat pitsanngorsaalluni suliassaq aallartinneqassaaq.

§ 45. Pitsanngorsaaniissamut tunngavissarititaa- sussaavoq attartukkat atorneqarnerminni naleqas- susiannik massakkut attartortumut siunissamilu attartulerumaartussanut suliat naleqarnerulersitsi- nissaat.

Imm. 2. § 51, imm. 1 naapertorlugu pitsanngor- saanerup nalinganut naatsorsuutit attartortitsisu- mit taamatullu attartortumit atsiorneqassaaq, attartornermullu isumaqatigiisummut kakkersaanneqassalluni.

§ 46. Attartortoq attartukkamini imaattunik pitsanngorsaaniissamut akuerineqarsinnaavoq:

- 1) Imermut uuttuummik aamma kiassarnermut uuttuummik ikkussineq.
- 2) Termostatitut ventilinik ikkussuineq.
- 3) Inissiap iluani oqorsaaqqinneq.
- 4) Igaffimmi, igalermi, uffartarfimmi perusersartarfimmiluunniit iluarsartuussinerit.
- 5) Atortulersuutinik, perusersartarfimmik, asaffinnik ergullu nillertup kissartullu kuuffinik taarsersuinerit.
- 6) Igaffimmi, igalermi, uffarfimmi perusersartarfimmiluunniit pequtinik, sikaavinnik nerriviusallu qaavinik taarsersuinerit.
- 7) Qaammaqqutinut atortunik assigiinngitsunik kiisalu ikkuffiit ilallugit ikkussuussinerit.
- 8) Aalap milluaasuanik qingalimmik ikkussineq.
- 9) Radiatorimik aalajangerlugu ikkussamik ikkussineq.

10) Atisaasivimmik igalaallu saavinut pladinik ikkussuinerit.

§ 47. Attartortoq attartukkami silataani imaattunik pitsanngorsaaniissamut akuerineqarsinnaavoq:

- 1) Aneersuarterfimmik matusineq, assiaqutsersuineq imaluunniit aneersuarterfimmik qilaanngusersuineq.
- 2) Inip silarlianik pilersitsineq.
- 3) Fransk altanimik inip alliup nalaaniittumik peersilluni aneersuarterfinngortitsineq.

§ 48. Attartortoq attartukkamini allanik imaattunik pitsanngorsaaniissamut akuerineqarsinnaavoq:

- 1) Igalaanik ilorlernik ikkussuineq.
- 2) Igalaanik matunillu silarlernik taarsersuineq.
- 3) Matumik matusineq matuliinerluunniit.
- 4) Kissarsuummik innaallagissamik sipaarutitalimmik taarsiineq.
- 5) Qammaqqutinut atortut amerlillugit ikkussuineq.
- 6) Innaallagissamut panelinik radiatorinillu innaallagiamoortunik ikkussuinerit.
- 7) Uffarfimmik peersineq.
- 8) Inimik uffartarfimmik pilersitsineq.
- 9) Ukioq kaajallallugu imermik pilersorneqarnermut atortunik ikkussuineq.
- 10) Pisortat imermut igitassamut kuuffeqarfiannut imaluunniit tankimut katersuiviusumut kuuffimmut atortunik attaviliineq.

§ 49. Attartortup pitsanngorsaaniermi suliat naammassinerat attartortitsisumut nalunaarutigissavaa. Attartortitsisup misissuinermigut pitsanngorsaaniermi suliaq akuerissavaa, aammalu pitsanngorsaaniermi suliaq sanasut suliaattut illersorsinnaasumik suliarineqarsimanersoq misissussallugu. Attartortup misissuinermit aningaasartuutit akilissavai.

Imm. 2. Pitsanngorsaaniermi suliat atuilermissamut akuersissummik pisariaqartitsiviuppata, taanna attartortitsisumut piniarneqassaaq.

Imm. 3. Pitsanngorsaaniermi suliat attartortitsisumut ingerlatsinikkut aserfallatsaaliuinikkullu immikkut aningaasartuutinik nassataqarpata, attartornermut akiliut aningaasartuutissat annertoqataannik qaffanneqassaaq.

Imm. 4. Attartornermi ataatsimi taamaallaat attartortitsisup misissuineraniit pitsanngorsaaniissamullu suliamut akuersineranit naatsorsorlugu qaammatit tulleriit 100-t ingerlanerini pitsanngorsaalluni suliasamut ataatsimut akuersissuteqartoqarsinnaavoq.

§ 50. Attartortup pitsanngorsaaniissamik qinnuteqaataata suliarineranut attartortitsisoq qinnuteqaammut ataatsimut 250 koruuninik akiliuteqartitsinissamik piunasaqarsinnaavoq.

Imm. 2. Akiliutissaq qinnuteqaatip tunniunneqarneranut ilanngullugu akilerneqassaaq.

§ 51. Pitsanngorsaalluni suliap nalinga attartortup akuersissummik piniarnerata nalaani pitsanngorsaaniermi aningaasartuutissavittut, attartortitsisup akuerisimasaattut natsorsorneqassaaq. Pitsanngorsaalluni suliat minnerpaamik 2.000 koruuninik naleqassapput, annerpaamillu 100.000 koruuninik naleqarsinnaallutik.

Imm. 2. Pitsanngorsaalluni suliasatut akuerisat tamakkerlutik suliarineqanngippata, imm. 1 naapertorlugu pitsanngorsaalluni suliat naammassineqartut nalingat naapertorlugu nalilerneqassapput.

Imm. 3. Attartortup attartugaq qimallugu nuunnerani, attartortitsisup § 45, imm. 2 naapertorlugu naatsorsukkat tunngavigalugit pitsanngorsaalluni suliarisimasaasa nalingat attartortumut akilissavaa.

§ 52. Pitsanngorsaalluni suliarineqartut illup ilaanik atortulersuutinilluunniit taarsersuinermik piiaanermilluunniit nassataqarsimappata, suliat nalinginit sinneruttut attartortitsisup § 51, imm. 3 naapertorlugu attartortumut akiligasaanit peerneqassapput.

Imm. 2. Pitsanngorsaalluni suliarineqartut taakkuunniit ilaat immikkut inuulluataarniutitut atortulersuutaappata, imaluunniit immikkut nukimmik atuisuuppata, taakku pitsanngorsaalluni suliat nalilerneqarnerinit ilanngaatigineqassapput.

Kapitali 10

Attartukkamik allamut attartortitsineq aamma inissamik qularnaarunneqarneq

§ 53. Attartortitsisoq sulisunut inissiamik naliginnaasumik, attartortumut Namminersornerulutik Oqartussat imaluunniit kommunip inissiaataanik innersuunneqarsinnaatitaasumut attartortineqartumik allamut attartortitsiniarnermut akerliusunnaangilaq:

- 1) sulisitsisoq inissiamik attartukkamik allamut attartortitsiniarnermissamut akuersisimappat, aamma
- 2) sulisitsisup inissiap normua atuinnaq.

§ 54. Attartukkamik allamut attartortitsinissamik qinnuteqaat allakkatigut attartortitsisumut tunniunneqassaaq, kingusinnerpaamik attartukkamik allamut attartortitsiniarluni kissaateqarnerup aal-lartinnissaa qaammammik ataatsimik sioqqullugu, qinnuteqaammilu makku taagorneqarsimassapput:

- 1) attartukkamik attartortussap aqqa cpr. normualu aammalu taassuma inoqutai pillugit paasissutissat.

2) Attartukkamik attartornissap sivissusissaa.
3) Attartukkap attartorneqartup angissusaa, tassunga ilannullugit ineqarnermut akiliut, kiassarneq, imeq, pequtinut akiliutit naleqquttut imaluunniit immikkut ittumik sullissinerit allallu.

4) Qularnaveeqqusiissummik akiliisoqassappat taanna pillugu paasissutissat.

5) Attartukkaminik attartortitsisup piffissami attartukkamik attartortitsiviusumi najugaqarfissaa pillugu paasissutissat.

Imm. 2. Attartukkamik attartortitsineq attartukkamik attartortitsisup aamma attartukkamik attartortup akornanni toqqaannartumik allakkatigullu isumaqatigiissuteqarnikkut pissaq. Isumaqatigiissut attartukkamik attartortitsinermut isumaqatigiissut, ineqarnermut naalakkersuisoqarfimmit akuerisaasoq atorlugu suliarineqassaaq.

Imm. 3. Attartukkamik attartortup paasissutissat imm. 1-imi taaneqartut eqqortuunerat uppersassavaa.

Imm. 4. Piffissaq attartukkamik attartortitsiviusoq naappat attartukkamik attartortitsineq ingerlaannartumik taamaatissaaq, tamatumalu attartukkamik attartortup inissiamik attartorneqartumik najukkaminik attartornerminut piumasaqaatit suli naammassimallugit piffissap attartukkamik attartortitsiviusup sivitsorneqarnissaa qinnuteqaatigisimangippagu.

§ 55. Attartortup illoqarfimmi najugarisami, attartortup siornatigut attartorfigisaani inissamik qularnaarinnissut tunniunneqarsimasoq atorsinnaavaa.

Imm. 2. Inissamik qularnaarinninnissamut qinnuteqaat allaganngorlugu kingusinnerpaamik piffissaq inissiamit nuuffiususaaq qaammammik ataatsimik sioqqullugu attartortumit attartortitsisumut tunniunneqassaaq. Inissamik qularnaarinnissutinik qaammatit 3-it inorlugit atuuttussamik tunniussisoqarsinnaangilaq.

Imm. 3. Inissamik qularnaarinnissutip atornissaanut qinnuteqaat allaganngorlugu kingusinnerpaamik piffissaq inissiamut nuuffiususaaq qaammatinik 3-nik sioqqullugu attartortumit attartortitsisumut tunniunneqassaaq. Inissiamut innersuussinermi inissiap angissutsimigut pitsaassutsimigullu inissiamut qimanneqartumut assingusuunissaa anguniarneqassaaq.

Imm. 4. Inissamik qularnaarinnissut piffissap inissamik qularnaarinniffiusup naanerani ingerlaannartumik atorunnaassaaq, tamatumani attartortoq imm. 5 naapertorlugu inissamik qularnaarinnissutip sivitsornissaanut piumasaqaatinik naammassinissimalluni inissamik qularnaarinnissutip sivitsorneqarnissaa qinnuteqaatigisimangippagu.

Imm. 5. Inissamik qularnaarinnissut qaammatit 12-it

tikillugit sivitsorneqarsinnaavoq, taamaattorli attartortoq peqanngikkallartussaappat, tamannalu nappaammik, ilinniarnermik, pinerluuteqarsimasunik inissiisarfimmiinnermik imaluunniit attartortup nammineerluni imaluunniit inoqutaasa ilaata nuutsikkallarnerneranik peqquteqarsimappat piffissaq sivitsorneqarsinnaalluni.

Kapitali 11

Inissianik paarlaanneq aamma nammineq kissaatigisamik nuunneq

§ 56. Inissianik paarlaanneq attartortut illuatungerisamik attartugaannik ingerlatsiinnarniarlutik isumaqatigiinnerisigut pippat, attartortut tamanna pillugu attartortitsisumut qinnuteqassappat.

Imm. 2. Inissianik attartortitsisarneq pillugu inatsisartut peqqussutaanni sukulluunniit atuuttumi piumasaqaatit naammassineqarsimappata attartortitsisup qinnuteqaammik tigusineranit kingusinnerpaamik ullut 14-it qaangiunnerini attartortitsisup qinnuteqaat akuerissavaa.

§ 57. Inissianik paarlaanneq attartortut inissiat nalinginnaasumik iluarsaanneqarnissaat imaluunniit nalinginnaasumik iluarsaanneqarsimasutut isikkoqarnissaat pillugu isumaqatigiissuteqarnerisigut pisimappat, attartortut tamanna pillugu attartortitsisumut qinnuteqassappat.

Imm. 2. Nalinginnaasumik iluarsaassinermi attartortitsisoq isumaginnittuussappat, tamanna qinnuteqaatip tiguneqarnerata kingorna piaartumik tunngavissaqanngitsumillu kinguarsaanertaqanngitsumik pissaq.

Imm. 3. Attartortut attartuligassaminni nammineerlutik nalinginnaasumik iluarsaassinissaaq isumaginarlugu qinnuteqaammi allakkatigut nalunaarutigippassuk, inissianik attartortitsisarneq pillugu inatsisartut peqqussutaanni sukulluunniit atuuttumi piumasaqaatit naammassineqarsimappata attartortitsisup qinnuteqaammik tigusineranit kingusinnerpaamik ullut 14-it qaangiunnerini attartortitsisup qinnuteqaat akuerissavaa.

§ 58. Attartortut nammineq kissaatigisamik nuunnissamut utaqqisut allattorsimaffianniittut inissiat marluk qimallugit ataatsimoorlutik ataatsimik iniartaanneqarnissamik kissaateqartut, nammineq kissaatigalugu nuuffissamik tunineqarnissamut nammineq kissaatigalugu nuukkusuttut allattorsimaffianni qinnuteqaateqarsimasunit allanit salliullutik tunineqartussaataappat.

Imm. 2. Attartortut imm. 1 naapertorlugu inissiamut ataatsimut nutaamut innersuunneqartut, innersuussinermiit kingusinnerpaamik qaammatit 12-it qaangiunnerini najugaqatigiinnerminnik

unitsitsigunik, nammineq kissaatigisamik nuunnissamut utaqquisut allattorsimaffianni inissisimaffitoqqaminnut utersinnaapput.

Imm. 3. Attartortoq inissiamut mikinerusumut nuunnissaminik kissaateqartoq qinnuteqartunit allanit nammineq kissaatigisamik nuunnissamut utaqquisut allattorsimaffianniittunit, nammineq kissaatigisamik nuunnissamut innersuunneqarnissamik salliusussaatitaavoq.

Imm. 4. Attartortut imm. 1 naapertorlugu inissiamut innersuunneqarsinnaasut attartortunik imm. 3 naapertorlugu inissiamut innersuunneqarsinnaasunit nammineq kissaatigisamik nuunnissaminnut innersuunneqarnissamik salliusussaatitaapput.

Kapitali 12

Attartornerup uninnera aamma attartornerit atorunnaarsinneqartut

§ 59. Attartorneq attanneqarsinnaasumik atorunnaarsinniarneqarsimappat, atorunnaarsinneqarsimappat imaluunniit unissimappat, attartortorlu attartukkaminut anisimangippat attartortitsisup ingerlaannaq attartortoq pinngitsaalillugu attartugaanit anisinniarsarissavaa, tak. Kalaallit Nunaanni eqqartuussisarneq pillugu inatsit.

Imm. 2. Imm. 1 naapertorlugu pinngitsaaliilluni anisitsinissamik piumasaqaat eqqartuussiveqarfimmi inissiap inissisimaffigisaani politiinut nassiunneqassaaq. Attartortoq pinngitsaalillugu anisinniagaq pillugu paasissutissat, kiisalu pinngitsaaliilluni anisitsinissamut tunngaviusunut uppernarsaatissat piumasaqaammut ilanngunneqassapput.

Imm. 3. Pinngitsaaliilluni anisitsinermut immaqalu pequtit peerneqarnerinut toqqornerinullu atatillugu aningaasartuutit attartortitsisumit ingerlatsinermi aningaasartuutit akilerneqassapput. Attartortitsisup aningaasat attartortumut inissiamit anisumut akilersinniarsinnaavai.

§ 60. Attartortitsisup nr. 1-4-mi pineqartut tunngavialugit attartornermik atorunnaarsitsinnginnermini, attartortitsisup attartortoq pissutsinik iluarseeqqullugu peqqussavaa, tak. inissianik attartortitsisarneq pillugu Inatsisartut peqqussutaanni § 73, imm. 2 aamma 5:

- 1) Inissiaq inatsisinik unioqqutitsilluni atorneqarpat.
- 2) Inissiaq ikerinnaannakkut qimanneqarpat.
- 3) Attartortitsisoq inatsisinik unioqqutitsilluni inissiamut iseqquneqangippat.
- 4) Torersaarnissamut maleruagassat unioqqutinneqarpata.

Imm. 2. Imm. 1 naapertorlugu peqqussut paasissutissanik imaattunik imaqassaaq:

- 1) Pissutsit peqqusinermit tunngaviusut.
- 2) Atorunnaarsitsisinnaanermut inatsisitigut

tunngaviusut.

3) Peqqussut piffissap peqqussuteqarfiusup naanerani naammassineqarsimangippat attartornermut isumaqatigiissutip atorunnaarsinnaanera.

4) Attartornermut isumaqatigiissut atorunnaarsinneqarpat attartukkap erngerluni qimanneqarnissaa.

§ 61. § 60 naapertorlugu peqqussut allakkatut nalinginnaasutut taamatullu allakkatut tammatsaalisatut imaluunniit aatsisartut aqutigalugit attartortumut nassiunneqassaaq. Attartortup allakkamik tammatsaalisamik tigusinerminut atsiornera imaluunniit aatsisartup allakkamik attartortumut tunniussinerminut allakkatigut uppernarsaanera allakkatigut peqqussutip attartortumut apuussimanageranumut attartortitsisup uppernarsaatissaraa. Attartortoq attartukkami naammattoorneqangippat, attartortup inoqutaasa ilaat, namminersorsinnaati-taasoq allakkap tammatsaalisap tigusineranumut imaluunniit allakkap aatsisartumit tunniunneqarneranumut uppernarsaalluni atsiorsinnaavoq.

§ 62. Attartortup atorunnaarsitsinerminut nalunaarutaa attartortumut allakkatigut nalunaarutigineqassaaq.

Imm. 2. Imm. 1 naapertorlugu atorunnaarsitsinermut nalunaarut makku pillugit paasissutissanik imaqassaaq:

- 1) Attartornermut isumaqatigiissut atorunnaarsinneqartoq.
- 2) Pissutsit attartornermut isumaqatigiissutip atorunnaarsinneqarneranumut tunngaviusut.
- 3) Atorunnaarsitsinermi inatsisit tunngaviusut.
- 4) Inissiaq qaqugu qimanneqareersimassanersoq pequtinillu imaarneqareersimassanersoq.
- 5) Attartukkamut matuersaatit qaqugu attartortitsisumut tunniunneqassanersut.
- 6) Misissuinermit nalunaarusiap suliarineqarnissaa eqqarsaatigalugu qaqugu inissiaq misissorneqassanersoq.

Imm. 3. Attartortup piffissaliussap nalinginnaasup iluani inissiamik qimatsinissami tungaanumut ineqarnermut akiliutit akiligassallu allat akilersussavai, taamatullu attartortup attartortitsisup annaasai suulluunniit akilissallugit, tassunga ilanngullugit attartortup attartukkamit anisinneqarneranumut atatillugu aningaasartuutit.

Kapitali 13

Attartortup inissiamik qimatsinermi nalinginnaasumik iluarsaassinissaa

§ 63. Attartortup inissiamik qimatsinissaa sioqqullugu attartortup inissiaq iserternermini pitsaassaatut ilersinniarlugu suliasat suut suliarineqassanersut nalunaarsorneqarnissaat siunertarlugu

attartortitsisoq sioqqutsisumik misissuinissaanik qinnuigisinnaavaa. Attartortup sioqqutsisumik misissuinissamut aningaasartuutit akilissavai.

Imm. 2. Sioqqutsisumik misissuinerlut atillugu attartortup nammineerluni nalinginnaasumik iluarsaassinermit suliarerusutani imaluunniit isumagi-niakkani ilisimatitsissutigissavai.

Imm. 3. Sioqqutsisumik misissuinerlut atillugu attartortitsisup nalinginnaasumik iluarsaassinissaq isumagisassarippagu, attartortitsisup nalinginnaasumik iluarsaassinermit aningaasartuutissat tamakkiisut pisussaaffiliiffiunngitsumik missiliorlugit paasisu-tissiissutigissavai.

§ 64. Attartortup § 65 naapertorlugu nalinginnaasumik iluarsaatai kukkuneqarpata amigaateqarpata-luunniit, attartortoq attartortitsisup attartukkamik nalinginnaasumik iluarsaassinermit aningaasartuutaanut taarsiisussaataavoq.

Imm. 2. Attartortup sanasullu attartortup suliaqar-titaata akornanni akiligassat sulluunniit attartorti-tsisumit susassarineqanngillat.

Imm. 3. Piffissap attartorunnaarfiusussap tungaanut attartortup nalinginnaasumik iluarsaassinerani suliai kukkuneqarlutik amigaateqarlutillu nalinginnaasumik iluarsaassineq eqqortumik suliarineqarsiman-ngippat, aammattaaq attartortoq pisussaavoq pif-fissap nalinginnaasumik ingerlatsiffiusup ingerla-nerani ineqarnermit akiliummut akiliuteqassalluni.

Imm. 4. Attartortoq attartortitsisup attartortussap nutaap, inissiami qimanneqartumi pissutsit peqqu-taallutik piffissaq eqqorlugu iserternissamut akornu-serneqartup inissineqarallarnernanut, pequtaasa toqqortarineqarnerinut allanullu aningaasartuutigi-sinnaasanut annaasaanut taarsiissalluni pisussaavoq.

§ 65. Inissiap nalinginnaasumik iluarsaanneqarne-rani atortut attartortitsisumit akuerisaasut atorneqas-sapput. Atortussanut aningaasartuutit attartortumit akilerneqassapput.

Imm. 2. Imm. 1 naapertorlugu nalinginnaasumik iluarsaassassat ilanngussaq 2 naapertorlugu suliarineqassapput.

§ 66. Attartortup nalinginnaasumik iluarsaassinermit aningaasartuutai uppersarneqarsimasut imm. 2 naapertorlugu attartortitsisumit taarserneqassapput taakkulu attartortitsisup nalinginnaasumik iluarsaas-sinermit aningaasartuutitut akiligassaanit annertunerusinnaanngillat.

Imm. 2. Taarsiissutissat aningaasartuutit uppersar-neqarsimasut tunngavigalugit naatsorsorneqas-sapput. Taarsiissutissat annerpaamik aningaasat immikkoortinneqarsimasut amerlaqatigissavaat, tak. § 32, imm. 1, nr. 1.

Imm. 3. Attartortup imm. 1 naapertorlugu

taarsiiffigineqarsinnaanera attartortup nalingin-naasumik iluarsaassinerani ilanngussaq 2-mi ma-leruaqqusat malinneqarsimannngippata atorunnaas-saaq.

Imm. 4. Attartortup inissiamik qimattussannguk-kaminik nalinginnaasumik iluarsaassineq nammi-neerluni suliarisimappagu, nammineq sulinerata nalinga taarsiissuteqarfigineqarsinnaanngilaq.

Kapitali 14 *Nakkutilliineq*

Aqutsineq

§ 67. Attartortitsisoq najugaqarfinnik kiisalu ingerlatsinermit aserfallatsaaliuinernullu immik-koortortaqarfinnik attartortitsisumit pigineqar-tunik aqutsineq akisussaaffigaa. Attartortitsisoq aqutsisussamik avataaneersumik atorfinitsitsisin-naavoq.

Imm. 2. Attartortitsisup aqutsisoq avataaniit atorfinitsinneqartoq nakkutigisarissavaa.

Imm. 3. Attartortitsisup nakkutilliinerminut atatil-lugu §§ 68-83-imi aalajangersakkat malinneqar-nersut alaatsinaassavaa.

§ 68. Attartortitsisup naatsorsuutitigut najoqu-tassat tamaasa takusinnaassavai, aammalu paasis-utissanik attartortitsisup nakkutilliinermini pisa-riaqartutut isigisaminik tamanik tunineqarnissa-mik piumasaqarsinnaalluni.

Imm. 2. Attartortitsisoq najugaqarfimmi imaluun-niit ingerlatsinermit aserfallatsaaliuinernullu immikkoortortami ingerlatsinermit aqutsinermit imaluunniit naapertuutitngitsoqarnera paasineqartil-lugu, imaluunniit najugaqarfiup imaluunniit inger-latsinermit aserfallatsaaliuinernullu immikkoor-tortap akiliisinnaassusiata aningaasaqarnikkulu pisussaaffimminik naammassinnissinnaassusiata nalornissuteqarfigineqarnera paasineqartil-lugu imm. 1 naapertorlugu isernissaminut itigartinne-qarpat, attartortitsisoq erngerluni tamanna pillugu Ineqarnermit Naalakkersuisoqarfimmut nalunaaruteqassaaq.

Aningaasaatinik ingerlatsineq

§ 69. Attartortitsisup najugaqarfimmi imaluunniit ingerlatsinermit aserfallatsaaliuinernullu immik-koortortami aningaasat ileqqaagai, sapinngisamik aningaasaqarnikkut isumannaannerpaamik aqutsi-nissaq aammalu taakkuninnga pitsaannerpaamik erniaqartitsinissaq eqqarsaatigalugit ingerlanne-qassapput. Attartortitsisup najugaqarfimmi ima-luunniit ingerlatsinermit aserfallatsaaliuinernullu immikkoortortaqarfimmi aningaasat ileqqaakkat

ataatsimut aqunneqarnissaat aalajangersinnaavaa. *Imm. 2.* Aningaasaatit qilersorsimangitsut, soorlu qularnaveequsiissutit, sillimmatissatut immikkoortitat assigisaallu taamaallaat aningaaserivimmi kontomut ilineqarsinnaapput, danskit naalagaaffiani obligationinik pisissutigineqarsinnaallutik imaluunniit pappiaqqanik nalilinnik, aningaasaliinermi annaasaqarsinnaanerup appaseqataanik inissisimasunik pisissutigineqarsinnaallutik.

Imm. 3. Attartortitsisoq imm. 1 naapertorlugu pisuussutinik, najugaqarfimmi imaluunniit ingerlatsinermut aserfallatsaaliuiner Mullu immikkoortortami ileqqaarneqartunik ataatsimut aqutsippat, attartortitsisup pisuussutit najugaqarfimmut imaluunniit ingerlatsinermut aserfallatsaaliuiner Mullu immikkoortortamut iluaqutaasumik erniortissinnaassavai, erniallu minnerpaamik qinerneqarsinnaasuni marluusuni ukunani erniat nalingisa qaffasinnerpaaffissaattut annertussuseqassapput, taamaattorli minnerpaamik 1,5 procentiussallutik:

- 1) Kalaallit Nunaanni aningaaserivimmi aningaaserivimmiitanut kontomut, killeqanngitsumik tigusiiffineqarsinnaasumut ikisiffineqarsinnaasumullu ernialiussat marloriaataat.
- 2) Danmarks Nationalbank-ip erniarititaat 2 procentpointinik ilanngarlugit.

Imm. 4. Attartortitsisup imm. 3 naapertorlugu toqqaaneranera ukiumoortumik missingersuusiornermi attartortitsisumit isumagineqassaaq, ukiumullu missingersuusiorfiusumut tulliuuttumut atuutissalluni.

Imm. 5. Erniortitsineq imm. 3 naapertorlugu erniortitsinissami erniarititassat sinnersimappagit, sinneruttut najugaqarfiup imaluunniit ingerlatsinermut aserfallatsaaliuiner Mullu immikkoortortaqarfiup pigisaanik nalilinnik ingerlatsinermi aqutsisuusumut tutsinneqassapput.

§ 70. Najugaqarfimmi imaluunniit ingerlatsinermut aserfallatsaaliuiner Mullu immikkoortortami aningaasat tioriaannaat attartortitsisumut imaluunniit attartortitsisup najugaqarfiutaanut imaluunniit ingerlatsinermut aserfallatsaaliuiner Mullu immikkoortortaqarfiutaanut allamut atukkiunneqarsinnaanngillat, taamaattorli imm. 2 takuuk.

Imm. 2. Najugaqarfiit imaluunniit ingerlatsinermut aserfallatsaaliuiner Mullu immikkoortortat ataatsimut ingerlanneqarpata, attartortitsisoq najugaqarfinnit akiliisinnaassutsikkut sinneqartoorfiusunit aningaasanik najugaqarfinnut akiliisinnaassutsikkut amigartooruteqarfiugallartunut nuussisinnaavoq. Tamatumani najugaqarfiit aamma ingerlatsinermut aserfallatsaaliuiner Mullu immikkoortortat ataatsimik piginnittoqarnissaat, aammalu taarsigassarsinermut isumaqatigiissusiortoqarnissaa akiitsullu akilersorne-rinut pilersaarusiortoqarnissaa, taamatullu ineqar-

nermut naalakkersuisoqarfiup nuussinissamik akuersissuteqareersimanissaa piumasarineqarpoq. *Imm. 3.* Najugaqarfimmi aningaasat ileqqaakkat atoriaannaat najugaqarfimmi najugaqartut akuersinerisigut suliassanik aningaasalersuigallarnermut atorneqarsinnaapput, tassanili aningaasaliis-sutaasut sivisunerpaamik ukiuni 10-ni akilersorne-qassapput aammalu suliaq missingersuutini naat-sorsuutinilu takuneqarsinnaassalluni.

§ 71. Attartortitsisup najugaqarfimmi imaluunniit ingerlatsinermut aserfallatsaaliuiner Mullu immikkoortortami nammineq aningaasaatinit, qularnaveequsiissutininit, sillimmatissatut illuartitanit allanillu sipaagaasa erniaat najugaqarfimmut imaluunniit ingerlatsinermut aserfallatsaaliuiner Mullu immikkortortamut tutsinneqassapput, taamaattorli tak. § 69, imm. 5.

Imm. 2. Imm. 1 naapertorlugu erniaritit at isertitatu nalunaarsorneqassapput, aammalu amigartoorutitut katersanut akiliutigineqassallutik, imaluunniit siunissami aserfallatsaaliuinissamut imaluunniit inissiat qimallugit nuuttoqarnerani annaasanut sillimmatitut immikkoortinneqassallutik.

Missingersuusiorneq

§ 72. Najugaqarfimmi ineqarnermut akiliutip annertussusaa ukiumut missingersuutit tunngavigalugit aalajangersarneqartassaaq aammalu inissiani inissiap angissusai tunngavigalugit agguarneqartassallutik.

Imm. 2. Ingerlatsinermut aserfallatsaaliuiner Mullu immikkoortortami ineqarnermut akiliut ukiumut missingersuusiat tunngavigalugit aalajangersarneqartassaaq. Ataatsimut aningaasartuutit inissiani inissiap angissusai tunngavigalugit agguarneqartassapput.

Imm. 3. Imm. 1-imi aamma 2-mi aalajangersakkat atuutissanngillat:

- 1) Aningaasartuutinut, najugaqarfimmut immikkoortumut ataatsimut annertoqqatigiinnik aningaasartalerlugu agguarneqarneqartunut akilersinneqartartunullu.
- 2) Aningaasartuutinut, taamaallaat inissianut attartukkanulluunniit ataasiakkaanut tunngasunut.
- 3) Najugaqarfinnut kattunneqarsimasunut, kisitsisit ataasiakkaanut naleqqiussat malillugit akiliuteqartitsiviusartumut, tak. § 17, imm. 5.

§ 73. Najugaqarfimmi imaluunniit ingerlatsinermut aserfallatsaaliuiner Mullu immikkoortortami missingersuutit tassaapput ingerlatsinermut missingersuutit aamma missingersuutit oqimaaqatigiisitsiviusut, taakkunanilu aningaasartuutit najugaqarfiup

imaluunniit ingerlatsinermut aserfallatsaaliuinernullu ingerlatsiviup ingerlanneqarnissaanut pisariaqartinneqartut, kiisalu isertitat missingersuutini aningaasartuutitut illuatungiliuttut pineqarput.

§ 74. Sinneqartoorutissanik amigartoorutissanilluunniit missingersuusiortoqassanngilaq. Taamaattorli ineqarnermut akiliutip akulikitsumik iluarsiivineqartarnissaa pinngitsoorniarlugu najugaqarfimmi imaluunniit ingerlatsinermut aserfallatsaaliuinernullu immikkoortortaqarfimmi attartortitsinermi qaammammut isertitat ilanngaataqanngitsut nalinginik illuatitsisoqarsinnaavoq.

§ 75. Najugaqarfimmi imaluunniit ingerlatsinermut aserfallatsaaliuinernullu immikkoortortami missingersuutit ilanngussaq 3-mi takussutissiarineqartut assilillugit ilusilerneqassapput.

§ 76. Attartortitsisoq ingerlaavartumik missingersuutininik misissuisassaaq aammalu qaammatit pingasukkaarlugit aningaasaqarneq pillugu nalunaarusiortassalluni.

§ 77. Missingersuutininik misissuinermi ingerlatsinermi § 74 naapertorlugu missingersuutininik iluarsiinissap akuerisaasup iluani matussuserneqarsinnaanngitsunik amigartooruteqartoqartoq paasineqarpat, ineqarnermut akiliummik qaffaasoqarnissaa sumoortumik nalunaarutigineqassaaq. Ineqarnermut akiliummut qaffaatissat missingersuutini iluarsisani, ineqarnermut akiliutip qaffanneqarnissaanik sumoortumik nalunaarummut ilanngullugu nassiunneqartussani allassimassaaq.

Imm. 2. Missingersuutininik misissuinermi akiliisinnaassutsikkut § 32, imm. 1, nr. 2 naapertorlugu annaasassanut matussutsitissat sillimmatitut immikkoortinneqareersunit matussuserneqarsinnaanngitsunik amigartooruteqartoqartoq paasineqarpat, ineqarnermut akiliummik qaffaasoqarnissaa sumoortumik nalunaarutigineqassaaq, tamatumani akiliisinnaassutsikkut amigartooruteqarneq qaangiuttussaannartut isigineqanngippat. Ineqarnermut akiliummut qaffaatissat missingersuutininik eqikkakkani iluarsisani, ineqarnermut akiliutip qaffanneqarnissaanik sumoortumik nalunaarummut ilanngullugu nassiunneqartussani allassimassaaq.

§ 78. § 77 naapertorlugu ineqarnermut akiliutinik qaffaatit siunertanut aalajangersimasunut atugassatut akilersinneqassapput. *Imm. 2.* Siunertanut aalajangersimasunut atugassatut akiliutit sivisunerpaamik ukiut tulleriit 5-it tikillugit akilersortinneqarsinnaapput.

§ 79. Missingersuutininik misissuinermi qaffasippallaamik missingersuusiorneq, akit apparnerat, pisariillisaanerit, aningaasartuuteqarfinnik atorunnaartoqarnera assigisaalluunniit peqquutaallutik, qaammammut ataatsimut ilanngaasiinertaqanngitsumik ineqarnermut akiliummik annikinnerusumik ingerlatsinikkut sinneqartooruteqartuarneq paasineqarpat, ineqarnermut akiliut iluarsiivigineqassaaq, aammalu ingerlatsinermi sinneqartoorutit illuartinneqassapput, piffissamullu missingersuusiortifusumut tullermut ilanngunneqassallutik, taamaattorli imm. 2 tak. *Imm. 2.* Imm. 1-imi ingerlatsinermi sinneqartoorutit pineqartut najugaqarfimmi imaluunniit ingerlatsinermut aserfallatsaaliuinernullu immikkoortortami ineqarnermut akiliutinik isertitanit ilanngaaserneqanngitsunit amerlaneruppata, attartortitsisoq sinneqartoorutit sumut atorneqarnissaannik aalajangiisinnaavoq, tassunga ilanngullugu sinneqartoorutit immikkoortinneqassanersut imaluunniit utertinneqassanersut.

Naatsorsuutininik saqqummiussineq

§ 80. Najugaqarfimmi imaluunniit ingerlatsinermut aserfallatsaaliuinernullu immikkoortortami ukiumoortumik nalunaarut qaammatinut 12-nut tunngassaaq, aammalu naatsorsuutit inernerinik oqimaaqatigiisinneqarnerinillu ilaqassalluni. Ukiumoortumik nalunaarut oqimaaqatigiisitsinerlu ilanngussaq 4 aamma 5 naapertorlugit ilusilerneqassapput. *Imm. 2.* Naatsorsuutit inernerisa takussutissiornerini naatsorsuutit tamarmik koruuninut ilivitsunut akunnaallisinneqassapput. Assersuutissatut kisitsisiliussat tusinde koruuninut ilivitsunut akunnaallisinneqassapput. Taamatuttaaq ukiumut tulliuuttumut missingersuutininik kisitsisitaliussat tusinde koruuninut akunnaallisinneqarlutik allanneqassapput. *Imm. 3.* Naatsorsuutininik oqimaaqatigiisitsinermi naatsorsuutit tamarmik tusinde koruuninut ilivitsunut akunnaallisinneqassapput.

Assersuutissatut kisitsisiliussat tusinde koruuninut ilivitsunut akunnaallisineqassapput.

§ 81. Ukiumoortumik nalunaarut najugaqarfiup kiisalu ingerlatsinermit aserfallatsaaliuinerimullu immikkoortortap pigisaanut akiligassaanullu, aningaasaqarnikkut inissisimaneranut kiisalu naatsorsuutaasa inernerinut eqqortumik takussutissiissapput.

Imm. 2. Pigisat akiligassallu akornanni aamma aningaasartuutit isertitallu akornanni aaqqiinnginnissamik periuseq najugaqarfiup kiisalu ingerlatsinermit aserfallatsaaliuinerimullu immikkoortortap naatsorsuutaanik saqqummiussinermit atuutissaaq.

Imm. 3. Ukiumoortumik nalunaarummi naatsorsuutit nalingi ilanngussaq 5-imi periutsit malillugit aalajangerneqassapput.

Pereersunik misissuineq

§ 82. Najugaqarfiup imaluunniit ingerlatsinermit aserfallatsaaliuinerimullu immikkoortortap ukiumoortumik nalunaarusiaa attartortitsisup kukkunersiuisuata avataaneersup misissussavaa. Kukkunersiuisup pereersunik misissuina kukkunersiuisutut ileqqorissaarnissaq tunngavigalugu suliarineqassaaq.

Imm. 2. Kukkunersiuisoq najugaqarfimmi imaluunniit ingerlatsinermit aserfallatsaaliuinerimullu immikkoortortamit paasissutissanik tamanik, kukkunersiuisup pereersunik misissuinermini pisariaqartutut isumaqarfigisaminik pissarsinissamut ikiorserneqarnissamullu pisinnaatitaavoq.

Imm. 3. Kukkunersiuisoq najugaqarfiup imaluunniit ingerlatsinermit aserfallatsaaliuinerimullu immikkoortortap ingerlanneqarnerani aqunneqarneraniluunniit naapertuutinngitsunik paasisaqaruni, erngerluni tamanna attartortitsisumut aamma ineqarnermut naalackersuisoqarfimmut nalunaarutigissavaa. Taamatuttaaq kukkunersiuisup najugaqarfiup imaluunniit ingerlatsinermit aserfallatsaaliuinerimullu immikkoortortap akiliisinnaassusia imaluunniit aningaasaqarnikkut pisussaaffimminik naammassinnissinnaassusia nalorninartoqartoq paasiguniuk nalunaaruteqassaaq.

§ 83. Kukkunersiuisup pereersunik misissuinermini ilanngussaq 6-imi pereersunik misissuinessamut ilitersuut malissavaa.

Imm. 2. Kukkunersiuisup ukiumoortumik nalunaarutip pereersunik misissuiffigineqarnera kukkunersiuisutut ileqqorissaarnissaq malillugu ingerlanneqarsimanera uppernarsarlugu

nalunaaqtsissavaa. Kukkunersiuisoq pereersunik misissuinermit nalunaaqtsiinermini nalorninartoqarneranik nalunaaruteqarpat, tamanna pereersunik misissuinermit nalunaarummi ersarissumik allassimassaaq. Kukkunersiuisoq pereersunik misissuinermini nalornissuteqarani uparuagassaqarpat, nalunaarummini tamanna pillugu tapertaasussanik paasissutissiissaaq.

Imm. 3. Kukkunersiuisoq kukkunersiuermini allattaavinnut allattuissaaq. Ukiumoortumik nalunaarummut allattaavinni makku ilisimatitsissutigineqassapput:

- 1) Kukkunersiuisoq piginaaneqarnissamut inatsimmi aalajangersakkanik naammassinninnersoq.
- 2) Kukkunersiuisoq misissuinermini paasissutissanik qinnutigineqartunik tamanik pissarsisimanersoq.

Kapitali 15

Atortuulerfissaa ikaarsaarnermullu aalajangersakkat

§ 84. Attartortunut piffissami 1. januar 1990-imiit 1. januar 1995-imut qularnaveeqqusiissummik nammineq toqqarlugu Kalaallit Nunaanni aningaaseriviit arlaanni kontomut matoqqasumut ikineqartunik akiliisimasunut makkua atuutissapput:

1) Qularnaveeqqusiissummik attartortumut tunniussinissaq attartornerup atorunnaarnerani aammalu attartortitsisup akuersineratigut, attartukkat paarinerlunneqarsimangippata aammalu attartortoq ineqarnermut akiliutissaminik akiitsoqanngippat aatsaat pisinnaavoq.

2) Piffissap attartorfiusup nalaani qularnaveeqqusiissummut kontomit attartortitsisoq tiguisinnaavoq, aserukkanut iluasaassinernullu aserorterisimanerup, paarsinerlussimanerup assigisaasaluunniit malitsigisaannik attartortumut nammagassiissutigineqarsinnaasunut matussutissanik.

3) Qularnaveeqqusiissummut konto taarsigassarsianut sallunaveeqqusiunneqarsinnaananilu eqqartuussisutigut malersorneqarnermut sallunaveeqqusiunneqarsinnaanngilaq.

Imm. 2. Attartortitsisup attartortup qularnaveeqqusiussaaniit qanoq annertutigisumik ilanngaassisinnaanera naatsorsorneqareerpat, attartornerup naanerata kingornagut

piaarnerpaamik attartortitsisoq attartortumut
allaganngorlugu naatsorsuusiamik nassiussissaaq,
tassanilu allassimassapput attartortup
qularnaveeqqusiussamit qanoq annertutigisumik
utertitsivigineqarnissaa, imaluunniit attartornissamut
isumaqatigiissut naapertorlugu attartortup
pisussaaffiitut matusissutissanik attartortoq qanoq
amerlatigisunik akiliisussaanersoq.

§ 85. Nalunaarut 15. maj 2008-imi
atortuulersinneqassaaq.

Imm. 2. Tamatumunnga peqatigitillugu illuutunik
ineqarfissatut attartortitsisarneq pillugu
Namminersornerullutik Oqartussat nalunaarutaat nr.
2, 6. marts 2007-meersoq atorunnaarsinneqarpoq.

*Namminersornerullutik Oqartussat ulloq 23. april
2008*

Kim Kielsen

/

Steffen Ulrich-Lynge

[Ilanngussaq 1](#): Imaasa allattorsimaffiat

[Ilanngussaq 2](#): Aserfallatsaaliuinissamut
innersuussutit.

[Ilanngussaq 3](#): Missingersuutit. (pdf-format)

[Ilanngussaq 4](#): Angusat naatsorsornerat. (pdf-
format)

[Ilanngussaq 5](#): Oqimaaqatigiisitsineq. (pdf-format)

[Ilanngussaq 6](#): Pereersunik misissuinissamut
ilitsersuut.